



جابتن حال إحوال اكلام إسلام قولاه قينخ
JABATAN HAL EHWAL AGAMA ISLAM PULAU PINANG



TEKS KHUTBAH
**SEBELUM HEMBUSAN
NAFAS TERAKHIR**



Tarikh Bacaan:
31 JULAI 2026M / 16 SAFAR 1448H

Dibiayai :



**MAJLIS AGAMA ISLAM
NEGERI PULAU PINANG**

Diterbitkan :



**JABATAN HAL EHWAL AGAMA ISLAM
PULAU PINANG**

***Jawatankuasa
Panel Semakan Teks Khutbah
Negeri Pulau Pinang***

- 1. Sahibus Samahah Prof. Madya Dato' Dr. Mohd Sukki bin Othman (Pengerusi)**
Mufti Kerajaan Negeri Pulau Pinang
- 2. YBhg. Ustaz Muhammad Fadzil bin Alias**
Pengarah, Yayasan Dakwah Islamiyah (YADIM) Pulau Pinang
- 3. YBhg. Ustaz Ahmad bin Hashim**
Mantan Penasihat, Pusat Pengajian Tahfiz Al-Quran (PPTQ)
Kolej Islam Teknologi Antarabangsa Pulau Pinang (KITAB)
- 4. YBhg. Ustaz Subki bin Mohamed**
Mantan Pensyarah Kanan, IPG Kampus Tuanku Bainun
- 5. YBrs. Dr. Mohamad Zaki bin Hj Abdul Halim**
Penolong Mufti, Bahagian Fatwa,
Jabatan Mufti Negeri Negeri Pulau Pinang
- 6. YBhg. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 7. YBhg. Ustaz Ahmad Shahimi bin Senawi**
Pendakwah
- 8. Ustaz Mohd Hanif bin Omar @ Wahab (Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)



Sebelum Hembusan Nafas Terakhir

31 Julai 2026M/ 16 Safar 1448H

الْحَمْدُ لِلَّهِ الْقَائِلِ: كُلُّ مَنْ عَلَيْهَا فَإِنَّ ۞ وَيَبْقَىٰ وَجْهُ رَبِّكَ ذُو الْجَلَالِ وَالْإِكْرَامِ ۞

سورة الرحمن

أَشْهَدُ أَنْ لَا إِلَهَ إِلَّا اللَّهُ، وَحْدَهُ لَا شَرِيكَ لَهُ، الْوَاحِدُ الْحَقُّ الْمُبِينُ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ، أَرْسَلَهُ هِدَايَةً وَرَحْمَةً لِّلْعَالَمِينَ.
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ، وَعَلَى آلِهِ وَصَحْبِهِ أَجْمَعِينَ.
أَمَّا بَعْدُ، فَاتَّقُوا اللَّهَ يَا عِبَادَ اللَّهِ وَأَطِيعُوهُ، وَاعْلَمُوا أَنَّكُمْ مُلَاقُوهُ، وَأَنَّ مَا عِنْدَ اللَّهِ
خَيْرٌ وَأَبْقَى.

SIDANG JEMAAH YANG DIRAHMATI ALLAH,

Marilah kita meningkatkan ketakwaan kepada Allah **سُبْحَانَهُ وَتَعَالَى** dengan melaksanakan segala perintah-Nya dan meninggalkan segala larangan-Nya. Sesungguhnya kehidupan di dunia ini hanyalah persinggahan yang sementara, sedangkan kehidupan akhirat itulah negeri yang kekal selama-lamanya. Khatib juga mengingatkan para jemaah agar memberikan sepenuh perhatian kepada khutbah yang akan disampaikan dan menjauhi perkara sia-sia.

Bagi melengkapkan kewajipan solat Jumaat kita pada hari ini, mimbar Jumaat pada minggu ini akan membicarakan tajuk: **Sebelum Hembusan Nafas Terakhir.**

SIDANG JUMAAT YANG DIMULIAKAN,

Kehidupan yang Allah kurniakan kepada kita pada hari ini bukan sekadar nikmat, bahkan merupakan amanah yang kelak akan dipersoalkan di hadapan-Nya. Setiap detik yang berlalu, setiap hela nafas yang dihembus dan setiap denyut nadi yang masih bergetar, sebenarnya membawa kita semakin hampir kepada saat pertemuan dengan Allah **سُبْحَانَهُ وَتَعَالَى**. Persoalannya, apabila tirai kehidupan dunia dilabuhkan dan kita berdiri di hadapan mahkamah keadilan Allah **سُبْحَانَهُ وَتَعَالَى**, apakah bekalan amal yang telah kita persiapkan?

MUSLIMIN YANG DIRAHMATI ALLAH,

Hakikat yang sering dilupakan ialah manusia terlalu sibuk menghitung keuntungan dunia, namun alpa menghitung bekalan untuk kehidupan yang kekal abadi di akhirat. Kehidupan dunia hanyalah pinjaman sementara daripada Allah. Pernahkah kita terfikir, berapa banyak lagi peluang yang masih Allah berikan untuk kita bertaubat, memperbaiki amalan dan mendekatkan diri kepada Allah sebelum tibanya hari perhitungan? Firman Allah **سُبْحَانَهُ وَتَعَالَى** yang bermaksud:

“Semua yang ada di bumi itu akan binasa. Dan Zat Tuhanmu yang memiliki kebesaran dan kemuliaan tetap kekal.”

(Surah Ar-Rahman, ayat 26–27)

SIDANG JEMAAH YANG DIRAHMATI ALLAH,

Sesungguhnya setiap insan sedang menempuh perjalanan menuju pertemuan dengan Allah tanpa mengetahui bilakah perjalanan itu akan berakhir. Setiap hari yang berlalu sebenarnya sedang menghakis usia yang masih tersisa di dunia ini. Imam Hasan al-Basri رَحْمَةُ اللَّهِ عَلَيْهِ pernah berpesan:

يَا ابْنَ آدَمَ، إِنَّمَا أَنْتَ أَيَّامٌ، كُلَّمَا ذَهَبَ يَوْمٌ ذَهَبَ بَعْضُكَ

Maksudnya: *“Wahai anak Adam, sesungguhnya engkau hanyalah kumpulan hari-hari. Setiap kali berlalu satu hari, maka hilanglah sebahagian daripada dirimu.”*

Betapa menyayat hati apabila masih ada insan yang menjalani kehidupan seolah-olah kematian itu terlalu jauh daripada dirinya. Lalu taubat terus ditangguhkan, dosa terus dipandang ringan dan tanggungjawab kepada Allah سُبْحَانَهُ وَتَعَالَى terus diabaikan.

Hakikatnya, hampir setiap hari kita dikejutkan dengan berita kematian. Ada yang dijemput Allah ketika sedang bekerja. Ada yang meninggal dunia ketika sedang memandu. Ada yang menghembuskan nafas terakhir ketika sedang berehat bersama keluarga. Semua ini menjadi peringatan bahawa ajal tidak menunggu usia tua dan tidak pernah menunggu manusia untuk bersedia.

Mungkin hari ini kita masih mampu berjalan dan bergelak ketawa bersama keluarga. Namun tiada jaminan kita masih berpeluang menikmati hari esok. Firman Allah سُبْحَانَهُ وَتَعَالَى dalam Surah Al-Jumuah, ayat 8:

قُلْ إِنَّ الْمَوْتَ الَّذِي تَفِرُّونَ مِنْهُ فَإِنَّهُ مُلَاقِيكُمْ ... ﴿٨﴾

Maksudnya: *“Katakanlah (wahai Muhammad): “Sesungguhnya kematian yang kamu lari daripadanya itu pasti menemui kamu...”*

MUSLIMIN YANG DIRAHMATI ALLAH SEKALIAN,

Antara tipu daya syaitan ialah menanam dalam hati manusia angan-angan yang panjang. Suka menangguhkan taubat kerana menyangka dirinya masih mempunyai masa yang panjang. Ramai yang terpedaya dengan dunia yang melalaikan sehingga terlupa bahawa ajal boleh datang pada bila-bila masa.

Sesungguhnya pintu taubat masih terbuka selagi nyawa belum sampai ke halqum. Allah سُبْحَانَهُ وَتَعَالَى sentiasa membuka pintu rahmat dan keampunan-Nya kepada hamba-hamba yang benar-benar menyesali dosa dan kembali kepada-Nya. Namun perlu diingat, peluang untuk bertaubat tidak akan terbuka selama-lamanya.

Apabila tibanya saat hembusan nafas yang terakhir, rayuan dan penyesalan tidak lagi memberi manfaat. Firman Allah سُبْحَانَهُ وَتَعَالَى dalam Surah an-Nisa', ayat 18:

وَلَيْسَ التَّوْبَةُ لِلَّذِينَ يَعْمَلُونَ السَّيِّئَاتِ حَتَّىٰ إِذَا حَضَرَ أَحَدَهُمُ الْمَوْتُ قَالَ إِنِّي تُبْتُ
أَلَّنَّ ... ﴿١٨﴾

Maksudnya: *“Dan tidak ada gunanya taubat itu bagi orang yang selalu melakukan kejahatan sehingga apabila salah seorang daripada mereka hampir sampai ajalnya kepada salah seorang daripada mereka, barulah*

dia berkata: Sesungguhnya aku bertaubat sekarang, (sedangkan taubatnya itu sudah terlambat).....”

Janganlah menunggu sehingga lembaran amal ditutup untuk kembali kepada Allah. Manfaatkanlah usia yang masih berbaki untuk menjadi hamba yang bertakwa. Jagalah solat, bacalah al-Quran, perbanyakkan istighfar, berbuat baiklah kepada sesama insan terutamanya ibu bapa.

MUSLIMIN YANG DIRAHMATI ALLAH,

Bayangkanlah keadaan seorang manusia ketika berada di ambang hembusan nafas yang terakhir. Pada saat itu, segala urusan dunia yang selama ini memenuhi fikirannya tidak lagi mampu membantunya. Harta yang dikumpulkan tidak mampu menambah walau sesaat umur yang berbaki.

Pangkat dan kedudukan yang dibanggakan juga tidak mampu menghalang kematian daripada menjemput dirinya. Yang tinggal hanyalah penyesalan yang tidak lagi berguna. Bahkan manusia pada ketika itu akan merayu agar dikembalikan ke dunia untuk beramal soleh.

SIDANG JEMAAH YANG DIRAHMATI ALLAH,

Sebelum mengakhiri khutbah pada hari ini, marilah kita bersama-sama menghayati beberapa pengajaran penting sebagai pedoman dalam kehidupan:

Pertama: Kehidupan dunia hanyalah sementara dan setiap manusia pasti akan kembali menghadap Allah *سُبْحَانَهُ وَتَعَالَى*.

Kedua: Segala nikmat kehidupan hanyalah pinjaman daripada Allah dan setiap pinjaman pasti akan kembali kepada pemiliknya.

Ketiga: Segeralah bertaubat dan memperbanyakkan amal soleh sebelum tibanya saat hembusan nafas yang terakhir.

Firman Allah *سُبْحَانَهُ وَتَعَالَى* dalam Surah al-Mu'minun ayat 99-100:

حَتَّىٰ إِذَا جَاءَ أَحَدَهُمُ الْمَوْتُ قَالَ رَبِّ ارْجِعُونِ ﴿٩٩﴾ لَعَلِّي أَعْمَلُ صَالِحًا فِيمَا تَرَكْتُ كَلَّا إِنَّهَا كَلِمَةٌ هُوَ قَائِلُهَا وَمِنْ وَرَائِهِمْ بَرْزَخٌ إِلَىٰ يَوْمِ يُبْعَثُونَ ﴿١٠٠﴾

Maksudnya: “Kesudahan keadaan orang kafir itu hingga apabila datang kematian kepada seseorang daripada mereka, dia berkata, “Wahai Tuhanku, kembalikanlah aku (ke dunia).” “Supaya aku dapat melakukan amalan soleh dalam perkara-perkara yang telah aku tinggalkan.” Sesungguhnya itu alasan yang diungkapkannya sahaja. Dan di belakang mereka ada alam barzakh (yang mereka tinggal tetap padanya) sampai ke hari mereka dibangkitkan (pada Hari Kiamat).”

بَارَكَ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلَ اللَّهُ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ، الْأَحْيَاءِ مِنْهُمْ وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



Khutbah Kedua

2026M/1447H

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا مُحَمَّدٍ النَّبِيِّ الْأَمِينِ،
وَعَلَى آلِهِ وَأَصْحَابِهِ وَالتَّابِعِينَ، وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، لَهُ الْمُلْكُ وَلَهُ الْحَمْدُ يُحْيِي وَيُمِيتُ
وَهُوَ عَلَى كُلِّ شَيْءٍ قَدِيرٌ، وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى سِرَاجِ مُنِيرٍ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ.

MUSLIMIN YANG DIRAHMATI ALLAH,

Setiap insan yang meninggal dunia akan berpindah ke alam barzakh dan akan ditempatkan di tanah perkuburan. Tidak sewajarnya menjadikan tanah perkuburan sebagai hak persendirian yang dibina dengan binaan kekal di atasnya. Menurut Fatwa negeri Pulau Pinang pada tahun 1963 menyatakan bahawa:

Pertama: Membina suatu binaan yang tetap (tidak boleh diubah) di atas kubur Wakaf Am, Adalah tidak dibenarkan pada hukum syarak.

Kedua: Menanam mayat di atas tempat mayat yang lama (kubur asal) yang sudah hancur adalah dibenarkan pada hukum syarak.

قَالَ اللَّهُ تَعَالَى: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا.

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،

اللَّهُمَّ أَعِزِّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَأَنْصُرْ مَنْ نَصَرَ الدِّينَ، وَاخْذُلْ مَنْ خَذَلَ الْمُسْلِمِينَ، وَأَعْلِ كَلِمَتَكَ إِلَى يَوْمِ الدِّينِ.

اللَّهُمَّ أَنْصُرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلَسْطِينَ وَفِي كُلِّ مَكَانٍ، وَفِي كُلِّ زَمَانٍ، بِرَحْمَتِكَ يَا أَرْحَمَ الرَّاحِمِينَ.

اللَّهُمَّ أَصْلِحْ أَيْمَتَنَا وَوُلَاةَ أُمُورِنَا، وَاجْعَلْ وَلَايَتَنَا فَيَمَنُ خَافَكَ وَاتَّقَاكَ يَا رَبَّ الْعَالَمِينَ. اللَّهُمَّ اجْعَلْ بَلَدَنَا مَالِيزِيَا خُصُوصًا وَلَايَةً قُولاو فَيَنْغِ آمِنًا مُظْمِنًا سَخَاءَ رَحَاءٍ، دَارَ عَدْلٍ وَإِيمَانٍ، وَأَمْنٍ وَأَمَانٍ، يَا ذَا الْفَضْلِ وَالْإِحْسَانِ.

اللَّهُمَّ وَفِّقْ قَادَتَنَا وَرُعَمَاءَنَا وَوُلَاةَ أُمُورِنَا لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Sultan Ibrahim dan Kebawah Duli Yang Maha Mulia Seri Paduka Baginda Raja Permaisuri Agong, Raja Zarith Sofiah.

وَكَذَلِكَ صَاحِبِ الْفَخَامَةِ،

Tuan Yang Terutama Tun Dato' Seri Utama Haji Ramli bin Ngah Talib, Yang di-Pertua Negeri Pulau Pinang dan Yang Mulia Toh Puan Raja Dato' Seri Utama Noora Ashikin binti Raja Abdullah.

“Ya Allah! Dengan sifat-Mu yang Maha Pemurah dan Maha Penyayang; Jadikanlah kami dan keturunan kami orang yang istiqamah mendirikan solat secara berjemaah, mengeluarkan zakat melalui Zakat MAINPP dan melaksanakan waqaf melalui Wakaf MAINPP.

Rahmatilah jua para pembayar zakat dan pewakaf sekalian, serta berkatilah usaha Kerajaan Negeri melalui Majlis Agama Islam Negeri Pulau Pinang (MAINPP) dalam usaha mewujudkan keseimbangan sosio-ekonomi ummah di negeri yang tercinta ini.”

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايِ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَى نِعَمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ.



جابتن حال إحوال اكلام إسلام قولاه فینخ
JABATAN HAL EHWAL AGAMA ISLAM PULAU PINANG